

Kaji kawasan yang sering dilanda banjir

ROMPIN - Tengku Mahkota Pahang, Tengku Abdullah Sultan Ahmad Shah meminta supaya satu kajian dibuat bagi menangani beberapa kawasan yang sering dilanda banjir khususnya di Kampung Kurnia, Rompin agar ia dapat ditanangi pada masa depan.

Tengku Abdullah bertitah, saban tahun ketika berlakunya musim tengkujuh, beberapa kawasan rendah di Rompin sering dinaiki air, justeru baginda berharap ada satu jalan penyelesaian dilakukan bagi menangani masalah itu termasuk membina rumah sementara yang lebih tinggi.

Titah baginda, rumah sementara yang dibina tinggi itu tidak perlu cantik tetapi ia sebagai alternatif atau persediaan kepada penduduk untuk berpindah ke rumah sementara berdekatan rumah penduduk yang dinaiki air.

"Saya harap Ahli Parlimen Rompin (Datuk Seri Dr Jamaluddin Jarjis) buat kajian teliti dengan cadangan pembinaan rumah sementara yang lebih tinggi di kawasan pedalaman berhampiran rumah penduduk bagi mengurangkan ketidakselesaan di pusat pemindahan banjir," titahnya.

Baginda bertitah demikian selepas berkenan berangkat mencemar



Tengku Abdullah dan Tunku Azizah menjamah biskut sambil beramah mesra bersama mangsa banjir di pusat pemindahan banjir Teluk Gading, Tanjung Gemok.

duli melawat mangsa banjir di pusat pemindahan banjir di Balai Raya Teluk Gading, Tanjung Gemok, Rompin.

Turut berkenan mencemar duli melawat mangsa banjir adalah Tengku Puan Pahang Tunku Azizah Aminah Maimunah Iskandariah.

Baginda bertitah, meskipun rumah sementara tinggi itu bukan sebagai penyelesaian masalah banjir, namun ia diharapkan dapat mengurangkan mangsa banjir di pusat pe-

mindahan banjir yang disediakan.

Bagaimanapun, titah baginda, cadangan itu hanya tertakluk kepada kawasan-kawasan yang sering dinaiki air saban tahun hingga menyebabkan penduduk terpaksa dipindahkan ke pusat pemindahan banjir.

"Rumah sementara banjir ini tak memerlukan belanja yang tinggi untuk didirikan tetapi ia dapat meringankan masalah sementara mereka setiap kali tibanya musim tengkujuh," titah baginda.